


inte 'na bociòfila, quella de via Amarena a San Frutozo, s'ean conosciui co-o curatò de questo libro.

A l'Armando Marini, da quande o studia a lengoa zeneize, gh'è vegnuo coæ de conosce megio e poêxîe do Parmini e, scicomme ch'en pròpio belle (quarchedunn-a premiâ co-o *Lauro d'Oro*), o l'â vosciuo publicale. A primma a l'é do 1955, quande l'aotò o l'aiva za sciusciantecinqu'anni, e a fa parte de quelle ispiræ da-a natua; pöi ghe n'è in sciâ caccia, in sciâ crònaca, sentimentali e... birichinn-e.

O ricavòu da-a vendita do libro o l'aniâ a l'AREO – Associazione Ricerca Emato Oncologica de San Martin.



### **Ritratti genovesi, Sagep, Genova 2013, pagg. 160**

A Galerìa d'Arte Luca Marletto a l'â ospitòu l'anno pasòu, in via David Chiossone, i ritræti che l'architetto e pitò Elio Vigna o l'â fæto a-i protagonisti da vitta pùblica de Zêna. Còmmè dixe o Franco Manzitti inta prefaziòn, 'na risposta artistica a-a domanda "Chi gh'è a-a goidda da çitæ?"

Inte questo libro gh'è tutti i sciusciantesette ritræti: én tutti primmi cén da faccia, tanti én pigiæ de fronte e n'amían inti éuggi, àtri én missi de tréi quarti, doì de profi.

O primmo o l'é o cardinale Bagnasco, poi in órdine alfabetico gh'è scindichi, inprenditoi (i ciù tanti), giornalisti, scindacalisti, personaggi do spetàcolo: amiàndoli, ògni-dùn se fà e seu conscideraçoin.... In sciâ covertinn-a gh'è l'autoritræto do pitò.



**Pier Guido Quartero, *Blue Avana – 100 ani di Taxi a Genova 1913-2013*, ed. Liberodiscrivere, Genova 2013, pagg. 144**

**Pier Guido Quartero, *L'Oro di Tabarca – Eredità contese, delitti e congiure tra Genova e Tabarca al tempo di Andrea Doria e di Dragut*, ed. Liberodiscrivere, Genova 2013, pagg. 176**

Pier Guido Quartero o l'â a pasciòn, e a capaçità, de mette insèmmè a realtæ e a fantaxìa, de mòddo che ség-gian ben mesciæ inte l'intresso do libro, ma asci che se pòsse de longo distingoe unn-a da l'àtra.

O primmo titolo, *Blue Avana*, o l'é o nómme de fantaxìa de'n bar frequentòu da tascisti de fantaxìa, che però pàrlan de còse vèe do sèu travàggio e de fæti capitæ e personàggi existii inta nostra çitæ.

O segóndo, invece, o l'é in romàzzo stòrico insce l'argoménto do sototitolo, e inte primme pàgine gh'è finn-a in quàddro cronològico ch'o va da-o 1453 a-o 1769, perché dòppo questo sciortia àtri doì libri che gh'àn zà o sò titolo. Ma no voémmo antiçipâ: pe òua gh'è da gödîse queste doe letûe, che van zù còmmè çerti vinètti che pàn legèri e pe cóntra gh'àn i sò bèlli gràddi.

